

SedrunSolar – Tuatschins cul pei sil gas

La damonda da baghegiar pigl implont da fotovoltaica SedrunSolar en Val Tujetsch ei inoltrada al cantun Grischun. La stad 2024 vul l'Energia alpina entscheiver a baghegiar.


HANS HUONDER/FMR

Suenter che la radunanza communal da Tujetsch ha dau il consentiment per la construcziun dils dus implonts da fotovoltaica sin siu intschess, ei in ussa gia in pass vinavon. Il gliendisdis ha l'Energia alpina inoltrau al cantun la damonda da baghegiar per si'ovra a Scharinas

– Cuolm Val. «Sch'ei dat buca recuors pesonts quintein nus da haver la lubientscha da baghegiar el decuors digl emprem quartal digl onn vegnent», di il president dil cussegl d'administraziun dall'Energia alpina, *Claudio Deplazes*. La finamira ei da saver entscheiver cullas lavurs da construcziun la stad 2024. Per menar il material sil plazzal preveda l'Energia alpina

d'installar ina pendiculara per material da Tschamut entochen el territori sin in'altezia da rodund 2000 meters sur mar. Ils cuosts pigl implont fotovoltaic ein calculai cun pressapauc 60 milliuns francs. Sin fundament dallas calculaziuns fatgas entochen ussa e dalla surfatscha da panels, vegn l'ovra a producir energia per rodund 6350 casadas.

Pagina 3



Visualisaziun digl implot da fotovoltaica a Scharinas – Cuolm Val en Val Tujetsch.

FOTOS MAD

«Termins realistics, sch'ei dat buca protestas pesontas»

Il gliendisdis ha l'Energia alpina inoltrau al cantun Grischun la damonda da bagheggiar pigl implot da fotovoltaica SedrunSolar el territori da Scharinas e Cuolm Val. La finamira ei da saver entscheiver culla construcziun la stad 2024. Il president dil cussegl d'administrazione dall'Energia alpina, Claudio Deplazes, ei optimists che quei ei pusseivel.

HANS HUONDER/FMR

Sin intschess dalla vischernaunca da Tujetsch ein dus gronds implots da fotovoltaica previ. Omisdus ein vegni acceptai dalla vischernaunca alla radunanza communal. In ei previus en Val Nalps ella vischinanza dil mir da fermada. Quei project ei els mauns dall'Axpo, ella ei era possessura da quella parcella. L'auter duei vegnir realisaus el territori da Scharinas e Cuolm Val agl ur dil territori da skis da Sedrun. Il terren per quei implot ei en possedd dalla vischernaunca da Tujetsch. La realisaziun duess succeder entras l'Energia alpina, l'interpresa ch'ei medemamein els mauns dalla vischernaunca da Tujetsch. Ella proveda la vischernaunca cun energia.

Inoltrau la damonda da bagheggiar

Il gliendisdis ha l'Energia alpina fatg in ulteriur impurtont pass en direcziun dalla realisaziun da siu grond project a Scharinas – Cuolm Val. Lu ei la damonda da bagheggiar pigl implot SedrunSolar numnadamein vegnida inoltrada al cantun Grischun. Ils davos meins ei l'Energia alpina sefatschentada intensivamein dil project da fotovoltaica empermettent. «Quei ei succediu en collaboraziun cun parteneris grischuns cun competenza ed experienttscha», scriva l'interpresa en ina comunicaziun als mieds da massa. Igl implot da fotovoltaica grond duei vegnir realisaus el territori denter las lavineras a Scharinas e la sutgera Val Val – Cuolm Val dil territori da skis da Sedrun. Quella surfatscha schai optimalmein ed ei medemamein gia accessibla cun ina via existenta. Medemamein exista leu ina colligiazion da tensiun media.

Energia per 6350 casadas

«Il project ei vegnius sviluppaus en stretga collaboraziun cun tuttas gruppas d'interess dil territori, en special las organisaziuns digl ambient», scriva l'Energia alpina. Sco quei ch'il president dil cussegl d'administrazione dall'Energia alpina, Claudio Deplazes ha detg sin damonda dalla FMR, survargan ils cuosts digl implot levamein la calculaziun fatga oriundamein: «Probabel vegnan els ad esser enzatgei pli aults ch'ils 60 milliuns francs previ. Nus essan ussa vid la calculaziun definitiva suenter haver dau prioritad als numerus detagls dalla damonda da bagheggiar. Pli aulta vegn era la prestaziun digl implot ad esser. Suenter haver optimau la parcella cun panels quanta l'Energia alpina cut ina tala per rodund 6350 casadas. «La parcella ei vegnida adattada cun



Il gliendisdis ei la damonda da bagheggiar pigl implot da fotovoltaica da SedrunSolar a Scharinas – Cuolm Val vegnida inoltrada al cantun Grischun.

**«Probabel vegnan
ils cuosts ad esser enzatgei
pli aults ch'ils 60 milliuns
francs previ.»**

Claudio Deplazes,
president dil cussegl d'administrazione
dall'Energia alpina

risguard da secturs cun palius, prau magher e loghens cun flurs specialas cun orchideas», di Claudio Deplazes. Igl implot vegn realisaus sin ina surfatscha da 320 000 meters quadrats.

Emprema badelada la stad 2024

L'Energia alpina quenta da survegnir la lumbentscha da bagheggiar igl emprem quartal 2024. L'emprema badelada pigl implot niev ei previda el decuors dalla stad 2024. Aschilunsch che l'Energia alpina vul seprofitar dalas subvenziuns dalla Confederaziun, ston 10 % dalla producziun finala digl implot vegnir furnids ella reit d'electricitat entochen la fin digl onn 2025. Per implorts gronds sburgescha la Confederaziun 60 % dils cuosts da

construcziun. Tenor Claudio Deplazes ei quei urari realistics: «Sch'ei dat buca protestas pli pesontas, duessen quels termins esser pusseivel. Nus havein fatg uatgas cun in tschappel organisaziuns digl ambient e dil maletg dalla cuntrada, ils resuns ein stai ordvart positivs.» Medemamein seigi ei vegniu menau discours culs purs e culs possessurs da tegias ella vischinanza digl implot previ.

Ina pendiculara pil material

Sco quei che l'Energia alpina constatescha en sia communicaziun als mieds da massa, ein la logistica, las resuras da montascha, la cumpria da material, la protecziun digl ambient e buc il davos era la rentabilitad las pli grondas sfidas da quei project grond. El rom dil svilup dil project ha l'Energia alpina installau il mars 2023 in indrez da test el territori: «Quei ei stau igl emprem indrez da test da fotovoltaica cun treis meisas cun moduls els cuolms svizzers. En cumbinaziun cullas experientschas fatgas davart las atgnadads localas ha il team da project saviu rimnar impurtontas informaziuns cun quei indrez. Grazia ad ellas sa igl implot vegnir realisaus aschia ch'el ha ina prestaziun optimala.» Tenor Claudio Deplazes eis ei previu d'installar pil temps da construcziun ina pendiculara pil material spel vitg da Tschamut: «La lingia da quella pendiculara meina sur la via cantunala e la viafier entochen sil plaz principal dil pazzal sin rodund 2000 meters sur mar. Aschia spargnein nus biars sgols cun helicopter.»